

Obraćanje članice Stalne delegacije Parlamentarne skupštine Bosne i Hercegovine u PSVE Nermine Kapetanović na zasjedanju Parlamentarne skupštine Vijeća Evrope na temu "Funkcioniranje demokratskih institucija u Bosni i Hercegovini".

Strazbur, 03. oktobar 2013.

"Dame i gospodo, drage kolege,

Doista cijenim priliku biti u mogućnosti da vam se obratim u ovom vrlo važnom trenutku za svoju zemlju. U isto vrijeme duboko sam zabrinuta zbog ishoda.

Ja neću poricati validnost uznemirujućih saznanja o krizi u BiH, pošto doista vjerujem u dobre namjere ovog tijela i Vijeća Evrope u cjelini. Povijest odnosa između BiH i Vijeća Evrope potvrđuje moja osjećanja.

Također, neću vam ponuditi nikakav izgovor, jer ste ih čuli mnogo tokom vremena. Izgovori, objašnjenja i politički argumenti kojima se iznose krivica i odgovornost koje su nas dovele do ovog tužnog trenutka, trebaju ostati u domaćem političkom polju. Sada i ovdje, vjerovatno po prvi put, kao što ste tome upravo svjedočili, članovi Delegacije BiH su govorili jednim glasom i imaju jedan zahtjev - dajte nam još malo vremena da dođemo do rješenja.

Neki bi mogli pomisliti da su predložene dosad neviđene i okrutne sankcije zaslužene. Iako ja ne dijelim takvo mišljenje, razumijem vašu frustraciju i frustraciju međunarodne zajednice. Tu frustraciju dijele mnogi od naših građana i birača, kao i moje kolege, te se osjećamo odgovornim da sve kritike uzimamo zaozbiljno i da sa najvećom odlučnošću damo svoj doprinos pronalasku rješenja.

Prije nego što donesete odluku i pristupite glasanju, ljubazno Vas molim da razmotrite sljedeća pitanja.

1. Koja je svrha sankcija? Da bi se kažnjavalo samo zbog kažnjavanja ili dati poticaj za proces političkih pregovora u BiH? Vjerujete li da bi nam sankcionisanje BiH na predloženi način pomoglo da se dođe do rješenja i da ispunimo svoje obaveze? Iako ne sumnjam u vaše dobre namjere, vjerujem da nam to neće pomoći .
2. Kao što je naša novija historija pokazala, neki politički ciljevi mogu se postići kroz pristup mrkve i štapa. No, u ovom konkretnom slučaju, mi nismo odustali od pokušaja da dođemo do mrkve. Sve ovo vrijeme su pravljene napore, a neki se još prave, čak i dok mi ovdje razgovaramo. Ali, ovdje je štap u vašim rukama. Međutim, stvar sa štapom je čudna. On radi dok je tu, a najjači je kada se ne koristi. Nakon što se iskoristi, onaj ko ga posjeduje više ne kontroliše proces i ima puno manje mogućnosti za djelovanje. Ako koristite

štap protiv nekoga ko pokušava doći do mrkve, vi više ne pomažete nego aktivno onemogućavate aktera. Ne ohrabrujete, nego obarate. Pošto ja vjerujem u vaše dobre namjere, vjerujem i da nećete oboriti BiH koja je provela sve presude Evropskog suda za ljudska prava i veliki broj postprijemnih obaveza.

3. Sama mogućnost takvih drakonskih sankcija je snažan instrument u vašim rukama . Kada se jednom iskoriste, to oduzima moć utjecaja i sav pozitivan i progresivan pritisak na političke vođe. To isključuje BiH, stavlja nas u neizvjesnost, ali ona također oduzimaju i vašu snagu i stvaraju jaz koji će biti teško prevladati. Lako je usvojiti sankcije, ali da li imate jasnu ideju o tome što treba učiniti sljedeće? Postoji li plan šta dalje sa BiH? Ili ćete jednostavno odustati? Odustati od nas i na taj način nagraditi one koji su blokirali sve pozitivne procese pokušavajući dokazati da je BiH nefunkcionalna i one koji crtaju nove mape za novu disoluciju Bosne i Hercegovine.
Kao ljekar, svjedočila sam da je mnogo nevine djece iz BiH umrlo zbog spore intervencije međunarodne zajednice, ali mi opraštamo, opraštamo ali ne zaboravljamo. Niko ne može voljeti više Bosnu i Hercegovinu od nas.

Ponoviću da cijenim vašu iskrenu zabrinutost, razumijem vašu rastuću frustraciju, vjerujem u vaše dobre namjere, te vas ljubazno molim da ozbiljno razmotrite ove argumente prije nego donesete odluku i pristupite glasanju, uz molbu da podržite naše amandmane.

Hvala vam za vašu predanost BiH, hvala na pažnji i uvažavanju." (kraj)